

كان نفسى

كان نفسى لما أكبر
أسند عليك ... إيدى
و أخاف يزيد حملى
فتقول لى .. لأ .. زيدى ..
تحضن إيديك كتفى
وتبص .. تتبسم
وتقول لى أنا فاكِر
تعبك وسهر الليل
أنده .. تردى لى
أؤمرنى يا ... سيدى !
كان نفسى لما أكبر

ألقاك هنا .. جنبى
أحكى و أشكى لك
عن جرح متخبى
و تمد لى ايدك
تمسح على قلبى
وتهدهد الآهه
تمحي دموع ذنبى
و أنام و أنا واثقة
هلقاك هنا ... جنبى !
كان نفسى لما أكبر
مبقاش كده .. خايفة
وعيونى تتبسم
و أعيش و أنا ... شايفة
خوفك على قلبى

وتراعى شوق .. حُبى
أعمل لك القهوة
نقعد ونشربها
أحكي على فكرة
فتقول ... نجربها !
أضحك .. وتضحك لي
و أكون كدة ... عايشة !
كان نفسى لما أكبر
أتخبى ف ضلوعك
تؤمر و تتسَيد
و أكون فدا طوعك
أسمع صدى صوتك
أفرح ... وب رجوعك
وتصلى تدعي لي

وتتاجى ف خشوعك

يشتد ريح قلبى

أتدارى ف قلوعك !

كان نفسى لما أكبر

أقرى لك الجرنال

و أقول كدة كفايه

فتقول لى قولى كمان

و كأنها غنوة ..

مليانة شوق وحنان

وأنول رضا قلبك

وترتل القرآن

كان نفسى لما أكبر

متكونش يوم تعبان

أسهر أهدهلك

أفرح تكون فرحان !

كان نفسي لما أكبر

ألقاك سند ... ليّا

تاخذ بايد روى

توصفنى ... يا قوية

وتكون حنون جدااا

تهدينى أغنية

أو كلمة نعلانه

مليانة حنيّة

أخفي عليك جرحى

و أهدي اليك فرحى

و أكون فدا عيونك !

لو مرة تتألم

أمسح جبين راسك

و أقول لك اتكلم
قلبي دة موصوف لك
إسند عليه راسك
ارمي همومك فيه
ولا مرة تتألم
قلبي دة ملك ايديك
ورضاك دوا عنيا!
كان نفسي لما أكبر
أسند عليك ...إيدى
و أخاف يزيد حملى
فتقول لى لأ ...
زیدی !!!